

פרשת נח: ראשון

ט אלה תולדת נח נח איש צדיק תמים היתה בדרתיו את האלהים
התהלך נח: י וילד נח שלשה בנים את שם את חם ואת יפת: יא ותשחת
הארץ לפני האלהים ותמלא הארץ חמס: יב וירא אלהים את הארץ והנה
נשחתה כיהשחית כל בשר את דרכו על הארץ: ס יג ויאמר אלהים לנח
קח כל בשר בא לפני כימלא הארץ חמס מפניהם והנני משחיתם
את הארץ: יד עשה לך תבת עצי גפר קנים תעשה את התבה וכפרת אותה
מבית ומחוץ בכפר: טו וזה אשר תעשה אותה שלש מאות אמה ארך התבה
חמשים אמה רחבה ושלשים אמה קומתה: טז צהר | תעשה לתבה
ואל אמה תכלנה מלמעלה ופתח התבה בצדה תשים תחתים שניים
ושלשים תעשה: יז ואני הנני מביא את המבול מים על הארץ לשחת
כל בשר אשר בו רוח חיים מתחת השמים כל אשר בארץ יגוע: יח והקמתי
את בריתי אתך ובאת אל התבה אתה ובניך ואשתך ונשי בניך אתך:
יט ומכל החי מכל בשר שניים מכל תביא אל התבה להחיות אתך זכר
ונקבה יהיו: כ מהעוף למינהו ומן הבהמה למינה מכל רמש האדמה
למינהו שניים מכל יבאו אליך להחיות: כא ואתה קח לך מכל מאכל אשר
יאכל ואספת אליך והיה לך ולהם לאכלה: כב ויעש נח ככל אשר צוה אתו
אלהים כן עשה: